

Morning Dogri (NSD)

National News

25-08-2024

1. प्रधानमंत्री नरेन्द्र मोदी होर आकाशवाणी पर अज्ज बडलै 11 बजे “मन की बात” प्रोग्राम राएं अपने बचार सांझे करगंन।
2. प्रधानमंत्री नरेन्द्र मोदी होर अज्ज महाराष्ट्र दे जलगांव ते राजस्थान दे जोधपुर दे दौरे पर जांगन।
3. सरकारी मुलाजमें एकीकृत पेंशन योजना दा सुआगत कीता ऐ। एह्दे कन्नै उनेंगी पेंशन उपलब्ध होना जकीनी होई जाग।
4. ब्राजील दे विदेश मंत्री मौरी विएरा होर अज्जै थमां भारत दे चऊं रोजा दौरे लेई नमीं दिल्ली पुज्जगंन।
5. नासा दे दो अंतरिक्ष यात्री सुनीता विलियमस ते बैरी विल्मोर होर अगले बरे फरवरी च स्पेसएक्स राएं धरती पर वापस पुज्जगंन।
6. भारत नै मालदीव च एशियाई सर्फिंग चैंपियनशिप च क्वालीफाई करियै औने आली एशियाई खेड्डें लेई सर्फिंग स्पर्धा च पैहली बारी अपनी थाहर पक्की कीती ऐ।

<><><><><><>

PM-MKB

प्रधानमंत्री नरेन्द्र मोदी होर अज्ज बडलै 11 बजे आकाशवाणी पर प्रसारत होने आले “मन की बात” कार्यक्रम राएं लोके कन्नै अपने बचार सांझा करगंन। एह् इस रेडिया कार्यक्रम दी 113मीं कड़ी होग। प्रधानमंत्री नरेन्द्र मोदी हुंदे आस्सेआ लगातार त्रीह बारी प्रधानमंत्री दा औहदा संभालने मगरा एह् त्रिया मन की बात कार्यक्रम होग। एह् कार्यक्रम आकाशवाणी ते दूरदर्शन दे सारे नेटवर्क, आकाशवाणी समाचार दी वैबसाइट ते न्यूज ऑन एयर ऐप पर बी कन्नो कन्नी प्रसारत कीता जाग। इस कार्यक्रम दा लाइव प्रसारण आकाशवाणी समाचार, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यू ट्यूब चैनलें पर बी कीता जाग। आकाशवाणी पर हिंदी प्रसारण दे तुरत मगरा एह्दा क्षेत्रीय भाषाएं च बी प्रसारण कीता जाग।

PM-Maharashtra

प्रधानमंत्री नरेन्द्र मोदी होर अज्ज महाराष्ट्र दे जलगांव ते राजस्थान दे जोधपुर दा दौरा लांगन। प्रधानमंत्री होर अज्ज डलै लखपति दीदी सम्मेलन च हिस्सा लैने लेई जलगांव दा दौरा करगन। इस दरान ओह् उनें 11 लक्ख नमीं लखपति दीदिएं गी सम्मानत करगन ते प्रमाण पत्र देंगन। जेहड़ियां हाल च गै एनडीए सरकार दे त्रीए कार्यकाल दरान लखपति बनियां हियां। प्रधानमंत्री होर इस दरान इंदे कन्नै गल्लबात बी करगन। एह्दे इलावा प्रधानमंत्री होर 2 ज्हार 500 करोड़ रपे दा फंड जारी करगन जेह्दे कन्नै आप सहायता समूह दे तकरीबन 48 लक्ख सदस्येंग ी फायदा होग। ओह् 5 ज्हार करोड़ रपे दा बैंक लोन बी मुहैया करांगन जेह्दे कन्नै आप सहायता समूहें दे 26 लक्ख सदस्यें गी लाह पुज्जोग। ध्यानजोग ऐ जे लखपति दीदी योजना शुरू होने दे बाद 1 करोड़ महिलां लखपति दीदी बनी गेदियां न ते सरकार नै 3 करोड़ लखपति दीदी बनाने दा धेइया पक्का कीता ऐ। तोआई संजा'लै प्रधानमंत्री होर राजस्थान च जोधपुर पुज्जगन। ओह् राजस्थान हाई कोर्ट दे 70 ब'रे पूरे होने दे समारोह च मुख्ख परौहने होंगन। एह्दे कन्नै गै प्रधानमंत्री होर राजस्थान हाई कोर्ट म्यूजियम दा उद्घाटन बी करगन।



Cabinet

सरकारी मुलाजमें केन्द्री मंत्रिमंडल दे एकीकृत पेंशन योजना गी मंजूरी देने दे फैसले दा सुआगत कीता ऐ एह्दे कन्नै मुलाजमें गी पेंशन उपलब्ध होना जकीनी होई जाग। उनें इस मुद्दे पर उंदे कन्नै मुलाकात करने पर प्रधानमंत्री नरेन्द्र मोदी हुंदा धन्नबाद बी कीता। संयुक्त सलाहकार मशीनरी जेसीएम दे सचिव शिव गोपाल मिश्रा होरें आखेआ जे प्रधानमंत्री होर उनेंगी मीटिंग लेई साद्दा दित्ते दा हा। उनें आखेआ जे इआं पैहली बारी होआ ऐ जे जेसीएम गी प्रधानमंत्री होरें साद्दा भेजे दा हा। जेसीएम सरकारी मुलाजमें दे संगठने दा इक मंच ऐ। केन्द्री मंत्रिमंडल नै कल सरकारी मुलाजमें लेई एकीकृत पेंशन योजना गी मंजूरी दित्ती ही। सूचना ते प्रसारण मंत्री अश्विनी वैष्णव होरें कल मंत्रिमंडल दी मीटिंग मगरा पत्रकारें कन्नै गल्लबात करदे होई आखेआ जे इस योजना च घट्टोघट्ट 25 ब'रें दी सेवा पूरी करने आले मुलाजमें गी खीरी दे 12 म्हीने दी मूल तन्खाह दे औसत दी 50 फीसदी रकम बतौर पेंशन दित्ती जाग। एह्दे इलावा मुलाजम दी मौत होई जाने मगरा परोआर पेंशन 60 फीसदी करी दित्ती गोई ऐ। घट्टोघट्ट 10एं ब'रें दी नौकरी मगरा रटैर होने पर घट्टोघट्ट 10 ज्हार रपे पेंशन दी गरेंटी होग। वैष्णव होरें आखेआ जे मंत्रिमंडल नै

अर्थबवस्था, पर्यावरण ते रोजगार नीति लेई जैव-प्रौद्योगिक नीति गी बी मंजूरी देई दितती ऐ जेहूदे कन्नै शोध ते उद्यमिता गी बढ़ावा थहोग। मंत्रिमंडल नै त्रऊं मुख्ख योजनाएं गी जारी रखने दी मंजूरी बी देई दित्ती ऐ जिनेंगी विज्ञान धारा योजना शामिल करी दितता गेदा ऐ। एहूदे लेई 10 जहार 5 सौ 79 करोड़ रुपे दा सरिस्ता कीता गेदा ऐ।

<><><><><><>

PM Cabinet Meeting

प्रधानमंत्री नरेन्द्र मोदी होरें राष्ट्र दी प्रगति च सरकारी मुलाजमें दे योगदान दी तरीफ कीती ऐ। एकीकृत पेंशन योजना दे फैसले मगरा प्रधानमंत्री नरेन्द्र मोदी होरें इक सोशल मीडिया पोस्ट पर आखेआ जे एहू योजना सरकारी मुलाजमें दे मान सम्मान ते माली सुरक्षा गी जकीनी करदी ऐ। उनें आखेआ जे सरकार नै अपने मुलाजमें दी भलाई बेह्तरी ते सुरक्षा गी जकीनी बनाने दा धेइया कीते दा ऐ। मोदी होरें आखेआ जे विज्ञान धारा दे सरबंध च मंत्रिमंडल दे फैसले कन्ने नोजवानें गी नमीं काहूडें ते साइंसी शोध गी लेइयै बढ़ावा थहोग। उनें आखेआ पर्यावरण, अर्थबवस्था ते नियोजन सरबंधरी जैव-प्रौद्योगिकी नीति कन्नै जैव सरबंधी माल तैआर करने च मुख्ख दी समर्थ बधोग।

<><><><><><>

Brazil FM-India

ब्राजील दे विदेश मंत्री मारो वेयरा भारत दी 4 दिनें दी यात्रा पर अज्ज नमीं दिल्ली पुज्जगंन। विदेश मंत्री डॉ. एस.जयशंकर ते वेयरा होर मंगलवारें 9मीं भारती ब्राजील संयुक्त आयोग बैठक दी सांझे तौर पर अध्यक्षता बी करगंन। विदेश मंत्रालय नै आखेआ ऐ जे इस ब'रे जी-20 दी अध्यक्षता ब्राजील कोल होने कन्नै मंत्री होर एहू बी चर्चा करगंन जे किस चाल्ली दौनें मुख्ख Troika दे तौरा पर पिछले ब'रे भारत दी जी-20 अध्यक्षता थमां मुख्ख7मुख्ख नतीजे गी अगगे बधाई सकदे न। मंत्रालय नै एहू बी आखेआ जे भारत ते ब्राजील दे सांझे मूल्यें च बहुआयामी सरबंध न ते विदेश मंत्री वेयरा हुंदी यात्रा 2006 च स्थापत रणनीतिक सांझेदारी गी होर मजबूत करने ते बक्ख-बक्ख क्षेत्रें च दपक्खिया क्षेत्रीय ते बहुदपक्खिया क्षेत्रें च सैहयोग दे नमें रस्ते दिक्खने दे मौके उपलब्ध करोआग।

<><><><><><>

NASA Space

नसा दे 2 अंतरिक्ष यात्री सुनीता विलियमस ते बैरी विल्मोर होर फरवरी 2025 गी स्पेस एक्स राएं धरती पर वापस आंगन। एह दौनें अंतरिक्ष यात्री मूल रूप च 8एं दिनें दे मिशन पर हे, लेकिन बोइंग स्टारलाइनर, अंतरिक्ष यान च खराबी दे कारण नेंगी अंतरिक्ष च तकरीबन 8 महीने रुकना होग। नासा नै आखेआ ऐ जे स्टारलाइनर बिजन क्रयू यानि चालक दल दे धरती पर वापस आंग। अंतरिक्ष यान गी अंतराष्ट्रीय अंतरिक्ष स्टेशन दी यात्रा दरान हीलियम लीक ते होरने खराबिएं दा सामना करना पेआ। बोइंग ते नासा दे इंजीनियर स्टारलाइनर कन्ने तकनीकी खराबिएं गी हल करने लेई कम्म करा'रदे न ते अंतरिक्ष यात्रिएं दी सुरक्षत वापसी जकीनी बनाने लेई बी जतन जारी न।

<><><><><><>

PM Ex-Gratia

प्रधानमंत्री नरेन्द्र मोदी होरें नेपाल दे तानहुन जिले च होए दे बस हादसे दे पीड़ितें गी मुआवजा देने दी घोषणा कीती ऐ। हादसे च मरने आलें दे नेङ्गमें सरबन्धी गी प्रधानमंत्री राश्ट्री राहत फंड थमां 2-2 लक्ख रपे ते घायलें गी 50-50 ज्हार रपे दी माली मदाद दिक्ती जाग। काठमांडू च भारतीय दूतावास नै आखेआ जे दुर्घटना च 27 भारतीय मारे गे न।

<><><><><><>

Amit Shah

केन्द्री गृह मंत्री अमित शाह होरें आखेआ जे माओवादिएं खलाफ लड़ाई हुन खीरले दौर च पुज्जी गेई ऐ ते इस गल्लै पर जोर भरेआ जे एह समां ऐ जे वामपंथी चरमपथ खलाफ निर्णयक अभियान शुरू कीता जा। छत्तीसगढ़ दे अपने दौरे दरान मीडिया कन्ने गल्लबात करदे होई शाह होरें भरोसा दोआया जे मार्च 2026 तोड़ी मुख्य नक्सली समस्या थमां पूरी चाल्ली मुक्त होई जाग। गृहमंत्री होरें एह बी घोषणा कीती जे छत्तीसगढ़ सरकार तौले गै माओवादिएं दे आत्मसमर्पण लेई इक नमीं नीति लागू करग।

<><><><><><>

Surfing

भारत नै मालदीव च एशियाई सर्फिंग चैंपियनशिप च क्वालीफाई करियै औने आली एशियाई खेड्डें लेई सर्फिंग स्पर्धा च पैहली बारी अपनी थाहर पक्की कीती ऐ। इस सर्फिंग चैंपियनशिप च मर्दे ते महिलाएं दौनें भारतीय टीमें क्वालीफाई कीता ऐ। एह्दे कन्नै हुन भारती खडारी 2026 ब'रे च जापान च होने आली एशियाई खेड्डें च हिस्सा लैंगन। सर्फिंग च 8 भारतीस खडारिएं 4 श्रेणिएं च शामिल होग। अंडर-18 च भारतीय खडारी किशोर कुमार सैमीफाइनल च पुज्जे।

<><><><><><>

Weather

मौसम विभाग नै अज्ज राजस्थान, मध्य प्रदेश, मध्य महाराष्ट्र ते गुजरात दे कच्छ ते सौराष्ट्र च तेज बरखा बरने दा अनुमान लाया ऐ। एह्दे इलावा असम, मेघालय, उत्तर प्रदेश, कर्नाटक, मराठवाड़ा ते विदर्भ च बी अज्ज भारी बरखा होने दी संभावना ऐ।

<><><><><><>

Balochistan rains

बलूचिस्तान च हाल च होई दी लगातार बरखें कारण 11 बच्चें सनें 22 लोकें दी मौत होई गई ते 13 लोक जखमी होई गे। बरखें कारण 5 ज्हार 448 लोक प्रभावत होए न ते तकरीबन 158 घरें पर बड़ा माड़ा असर पेआ ऐ। एह्दे अलावा 102 एकड़ च लग्गी दी फसल बी तबाह होई गई ऐ। 35 किलोमीटर शिड़क ते 7एं पुलें गी नुकसान पुज्जा ऐ। इनें बरखें कारण 131 माल बच्छें दी बी मौत होई गई ऐ।

<><><><><><>